

Guijtz Ganid Nani Bacuaa Pedr

Pedr cacuaa guijtz loj reni rililajz ni nare'ch

¹ Narä Pedr, te apost xten Jesucrist, cacuaä gui-jtzre loj renani agule Dios gac rexpejñni nani rbäjz si'c benzijt lo reguedx Ponto, Galacia, Capadocia, Asia, näjza Bitinia.

² Xtadnu Dios gule la'tu galooli bencheeni niguii, aguleni la'tu par lagajc laani te gun Sprit Dxaan xtenni xtzuunni neñ lastootu te gusoobtu xtidx Jesucrist te jia lastootu con xtiejn Jesucrist. Rniabä lo Dios gacnäduxhruni la'tu, guscuedxini lastootu lo guiraliiti.

Te yälñabajñ ni cabääznu

³ Colguiliä'p xpala'n Dios ni najc Xtad Jesucrist, Dios nani xcuent xcälñulaslazduxhni bejñni gojpnu te yälñabancoob sa'csi baspañsacni Jesucrist loj re-benğut. Sa'csi rajpnu yälñabancoob, ni'c nadippac lajznu.

⁴ Ni'cni laani suniidxni te yälñusalajz ni di nitloj, ni di xhiñ, ni di jiuii si'c riuii rebalajg. Yälñusalajzga aguluchedzu'tzni xhaguibaa par la'tu,

⁵ nani cayapdzu'tz xcälñmilaagwr xten Dios sa'csi rililajztu xtiidxni, te guluii Dios guira'ti ni rajpni par la'tu, ni arapcheeni te guluiinireni lojtu che luux guedxliujre.

⁶ Ni'cni rbalazduxhtu, mase nanab tedtu balti trabajw gaie'si dxej lo guedxliujre,

⁷ te guzen xho rililajztu. Xcäl_rililajztu saj_cru lo oor nani rnitloj, niluxh xcäl_rililajztu di nitloj, mase tedni lo guiboo, ni'cni sinii Dios didxsa'c, didxro, siliä'pni xpala'ntu che guibisac Jesucrist lo guedxliujre guideb xcäl_milaagwrni, näjza xcäl_rdimbicha'ni.

⁸ Mase gajdtu fii lojni, sanälajztuni. Mase ditu fii lojni naj, ahuililajztu xtiidxni, rbalazduxhtu guideb yäl_rbalajz ni rut rajcdi rusule', sa'ni yu' xhaguibaatis,

⁹ sa'csi xcäl_rililajztu sus_laa xaimtu lo dojl, sica'tu yäl_nabajn par tejpas.

¹⁰ Luxh xcuent yäl_rus_laa dojlre, rebejn nani gunii xtidx Dios agujc xchero, laareni abasulexgaareni xcuent xcäl_racnä_j Diosre nani siäd lojtu. Luxh bisiedduxhreni, gunabdiidxzareni,

¹¹ te rlazjreni gacbeereni chu bejn o gucpac gac nani cagusä't Sprit xten Crist ni yu' ne_n lastooreni che gunixgaani xho nungäj_l ted Jesucrist trabajw, dxejcru xcasacni yäl_rnibee.

¹² Baluii Dios lojreni, di rediidxga soob ne_n redxej ni nabaj_nreni, alga par la'tu najc rediidxga. Naj agunii rebejn ni rusule' xtidx Dios rediidxga lojtu. Abasule'reni xtidx Jesucrist sa'csi xhaguibaali baxhal_Dios Sprit Dxan xtenni te cuääzni ne_n lastooreni. Näjza rexangl Dios ni rbäjz xhaguibaa rlazj gacbeerureni rediidxga.

Xcäl_naba_n_nayanu nez loj Dios

¹³ Ni'cni, colsanij xcäriejntu, col_gusudzu'tz lastootu, guideb lastootu col_yenloj yäl_racnä_j xten Dios ni abia'n diidx xca'nu che guibisac Jesucrist lo guedxliuj.

14 Gactu si'c biuux nani ruseob xtidx xtdadni. Na'cru xcäjbtu guntu redzunguidx ni bejntu galoo che gajdtu gumbee Dios.

15 Dios ni gule la'tu najc dxan. Sigajcza la'tu, loj guirali ni rujntu colyajc bendxan.

16 Sa'csi lo xtidx Dios caj scree: "Sajctu bendxan sa'csi narä nacä dxan."

17 Palga la'tu rniitu "Dad" lo Dios nani tebloj rujn yälguxhtis loj guiraa bejn xcuent dzuun ni bejn ni, la'tu riäjl guidxejbtuni guiraa dxej ni nabañsijctu lo guedxliujre.

18 Anajntu di Dios nudeed yäl'nasa'c ni rnitlojdi, si'c oor näjza pla't, te baslaani la'tu lo recostumbr ni cua'tu lo retoxtadgoldootu. Recostumbrga xhet sa'cdireni. Di Dios nudeed oor nicla pla't te baslaani la'tu,

19 badeedni rejn ni sacduxh te baslaani la'tu loj xtojltu. Rejn si'c xtiejn te xiil ni naya, xhetpac najcdini, xtiejn lagajc Jesucrist.

20 Guliipacni che gajdli guirixtiej guedxliujre, gule Dios Jesucrist, niluxh najru, nen redxelult che gajd guedxliujre nitloj, biädluilojni par xcäl'nasa'ctu,

21 la'tu nani rililajz xtidx Dios xcuent Jesucrist. Luxh Dios baspañsac Jesucrist loj rebengut, badeedni yäl'nabee lojni, ni'cni ahuililajztu xtidx Dios, luxh Diostis cayenlojtu naj.

22 Naj sa'csi abasoobtu xtidxliini, te si'c abasiatu lastootu te gac chanälajztu sa'tu, naj guideb lastootu colchanälajzpac sa'tu.

23 Sa'csi acua'tu xcäl'nabañcoobtu xcuent xtidx Dios ni najc par tejpas, et xcuentdi xtidx bend guedxliuj ni rnitloj. La'tu najctu si'c cuaan ni

rlijn lo bejdz ni siääd xhaguibaa, xhet lo bejdzdi ni rnitloj.

²⁴ Galooli gunii Dios scree:

Guiraa reben guedxliuj najc si'c recuaan,
guiraa xcäl₁nasa'creni najc si'c reguii ni rcaj lo
cuaan,
recuaan rgol, lirtejbza reguii xtenni,

²⁵ niluxh xtidx xtad Jesucristnu rsiudzu'tzni tej-
pas.

Luxh diidxre najc diidx ni basule'reni lojtu.

2

¹ Ni'cni colgusaan guiraa redzunguijdx ni yu' lo guedxliuj, na'c gusgueetu sa'tu, na'c guntiop lajztu, na'c chuguij lajztu xhixten sa'tu, na'c guiniyaj sa'tu.

² Si'c riojl rebäznite' le'ch, si'cza colquuil xtidx Dios par sprittu. Coljioj₁ xtidx Dios te gustioobruni la'tu lo yäl₁rus₁laa lo dojl,

³ palga agucbeetu lacti hueen najc xcäl₁racnä₁j Jesucrist.

Crist najc si'c te guij ni nabajn

⁴ Colguibig loj Jesucrist ni najc si'c te guij ni nabajn. Laani suniidx yäl₁nabajn par tejpas loonu. Rebejn badzucaj guijga, niluxh Dios gulenini sa'csi sacduxhni.

⁵ Sigajcza tejgatu najctu si'c guij ni nabajn, ni'c colgusaan xca' Dios la'tu, reguibajn, te con la'tu gunchee Dios te yu' cadre cuääz Sprit xtenni, te gactu rexpixhojz Dios, nani nayapac lastooreni. Ni'cni sa'csi najctu tejtis con Dad Jesucrist sudeedtu lo Dios guiraa xcäl₁nasa'ctu con xp₁rit xtentu. Dee najc nani rchaglajz Dios.

⁶ Sa'csi galooli gunii Dios scree:
 Agule'cä te bejn neñ guedx Sión, nalajznu
 Jerusalén,

ni gac si'c te guisa'c, te guiro ni rsiuj squiin te yuro.
 Chutis bejn ni chalilajz xtiidxni, dini jianxtujy.

⁷ Lojtu ni ahuililajz xtiidxni najcni si'c te guisac-
 duxh, niluxh loj renani gajd chalilajz xtiidxni,
 najcni:

Guij ni gulälaz renani cayunchee yu',
 lagajc guijsa gujc guijsac ni baliib squiin xten
 yu'ga

⁸ näjza:

Te guijsa ni rliaj ni' bejn, ni ruzälta'reni,
 laareni riajbreni sa'csi direni gusoob xtidx Dios,
 luxh agunibexgaa Dios nitlojreni.

Renani gule Dios

⁹ La'tu najctu te cuaa bejn ni agule Dios, tej-
 gatu najctu rebixhojz ni najc si'c rei xten Dios.
 La'tu najctu te beñnaya, te beñsa'c, rexpejn pacni.
 Aguleni la'tu te gusule'tu reyäl nasacduxh ni bejn
 Dios ni gurejdxu che guyu'tu lo nezyunacäy xten
 guedxliujre te biu'tu lo nezyuj ni rdimbichasejz
 xten Dios.

¹⁰ La'tu galoo rut najcdu, niluxh naj najctu
 rexpejn pac Dios. Galoo gajd Dios gulaslajztu, luxh
 naj abalaslajz Dios la'tu.

Colguibajn lo xnezyuj Dios

¹¹ Rebetzä ni sanälazä, nabajntu lo guedxliujre
 si'c benzijt, ni rbäjz te laad, ni'c rniabduxhä lojtu,
 na'c guntu recosguijdx xten guedxliujre, ni rutijl
 neñ lastoo bejn te cuälazreni xnezyuj Dios.

12 Colguibansa'c lal ni yu'tu loj rebenzijt ni di gac xpejn Israel te palga guiniyajreni la'tu gäbreni najctu benlatsiaj, che fiireni redzunsac ni rujntu, siliä'ppacreni xpala'n Dios che jiädsac Jesucrist te gunni yälguxhtis.

13 Ni'cni, sa'csi huililajztu xtidx Jesucrist, colgusoob xtidx guiraa reni rnibeetu lo guedxliujre, si'c najc presidentro,

14 regubernadoor nani ruxhalni te rujnreni yälguxhtis rebendojl näjza te guiliä'pni xpala'n reben nani laaca rujnreni.

15 Sa'csi Dios rlajz guntu recossa'c te cuedxitu rextidxnayääl ni rnii reni di rlajz gumbee didxlii xcuent Jesucrist.

16 Colguibajn si'c bejn ni rut rnibeedi, na'cza guntu latsiaj sa'csi rut rnibeeditu, colguibajn si'c guinibee Dios.

17 Ga'ptu yälndolajz loj guiraasi bejn. Colchanälajz sa'tu ni rililajz. Colguidxejb Dios, colguiliä'p xpala'n presidentro.

Gudejd Jesucrist trabajw te baluini xho jiennu

18 La'tu ni najc mos, guideb yälndolajz colgusobdiajg guiraa xtidx rexlamtu, xhet ganaxdi relamsa'c ni najc nadolajz, näjza relam ni najc benguijdx.

19 Sa'csi rchagljaz ruhuii Dios te bejn palga sa'csi rililajz te bejn xtidx Dios rujn bejn huant che rdejdnj trabajw luxh xhet bejndini.

20 Palga la'tu rujntu latsiaj ni'cni rusacsíni la'tu, çxi guntu gaan palga rujntu huant rdejdtu trabajw? Niluxh palga la'tu rdejdtu trabajw sa'csi

rujntu redzunsac, luxh rujntu huant, ni'c najc laaca nez loj Dios.

²¹ Te guntu si'c gurejdx Diostu, sa'csi gudejdz Jesucrist trabajw xcuenttu te guluiini xho guntu che chanuutu lo xnezyujni.

²² Laani dini niujn nicla tej dojl, laani dini nus-guee nicla tej bejn con didx-xhii.

²³ Che guniyajreni lojni, dini nudzu' yälrniyajga. Che cadejdni trabajw, dini nudzu' diidx niluxh bateedni lagajc laani ladzn̄aa Dios ni rujn yälguxhtissa'c.

²⁴ Gudeed Jesucrist trabajw si'c te bendolduxh, bacuaarenini lo cruz te ro'c gusacsíduxh tiejxhni xcuent xtojlnu, te na'c gunrunu dojl, te guibansa'cnu lo xnezyuj Dios. Gudilguijdxreni tiejxhni te basiajcn̄i la'tu.

²⁵ Sa'csi galoo gujctu si'c rexiiil ni rut rajpdi, rijreni nezree-nezrec. Niluxh naj agubisactu lo xpaxtoortu nájza nani randzu' xaimtu, Jesucrist.

3

Xho nanab guiban̄nájtu chäältu

¹ Sigajcza la'tu, regunaa ni abachn̄aa, colgusoob xtidx chäältu, te mase yu' tejreni ni di chalilajz xtidx Dios, sililajzni xtidx Dios sa'csi fiini xho rujntu mase xhet rniidilu.

² Sa'csi fiini xho riulu xtiidxni nájza xho rniilu nadolajz lojni, nájza xho naban̄nása'cluni.

³ Na'c gusuheetu ganax lo jiaatis, si'c najc guichniil yejctu, nájza biaoer ni rcaj diajgtu, guejntu, naatu, nájza ladsa'c ni najc sacru.

⁴ Colgusuchenāj lastootu yäl_nadolajz, yäl_rbedxī lajz, nājza yäl_sanälajz, sa'csi direni nitloj, luxh sacduxh_reni nez loj Dios.

⁵ Galoo si'cza bejn regunaa ni gujc xpej_n Dios ni huililajz xtid_x Dios, basuc_heereni lastooreni, basoob_reni xtid_x chääl_reni.

⁶ Si'c gujc toSara, basobdiajgni xtid_x toAbram, guniizani lo toAbram, Dad. Naj najctu si'c laani palga rujntu redz_unsa'c, nājza na'c guidxej_bditu.

⁷ Sigajcza la'tu, niguii ni abach_naa, colguib_annäsa'c chääl_tu. Colgapdani sa'csi dini gacnadip si'c te niguii; nanab guntu si'c sa'csi nājza lojreni badeed Dios yäl_nabaj_n par tejpas. Col_yej_n si'c, te gucuadiajg Dios che cuedx-guiniabtu lojni.

Renani rdejd trabajw che laaca rujnreni

⁸ Dee najc ni caniä loj guiraatu, saru colguib_annäj sa'tu. Colgul_aslajz sa'tu, colchanälajz sa'tu si'c rinälajz te niguii bejtzni. Gactu be_nsa'c, be_nnadolajz.

⁹ Na'c gudzu'tu didxguijdx che guiniireni didxguijdx lojtu, na'cza gudzu'tu didxyaj che guiniireni didxyaj lojtu. Alga gunab lo Dios gacnäj_nireni, sa'csi ni'cni gule Dios la'tu, te sica'zatu reyäl_nasa'c ni guniidxni lojtu.

¹⁰ Sa'csi scree caj lo xtid_x Dios:

Nani rchaglajz guibaj_nni,
luxh rlajzzani saru tedni redxej lo guedxliujre,
sugudxo_jnni guinii ro'ni didxnaj nājza didx-xhii.

¹¹ Guibicajni loj redzunguijdx, sugunni redz_unsa'ctis.

Suquii_lni yäl_rbedxi te ni'c chanuuni.

¹² Sa'csi ruhuii Dios rebej_n ni rujn dzunsa'c,

rucuadiajgzani xtiidxreni che rniabreni lojni.

Niluxh rudzuréni lojni, rbälazzani renani rujn latsiaj.

¹³ ¿Chu laa ni gun latsiaj la'tu, palga la'tu rbaali lajztu rujntu dzunsa'c?

¹⁴ Palga caxäjsi tedtu trabajw che guntu redzunsa'c. ¿Chicbaatu! Na'c guntu xhigab, niclaza guidxejbtu xcälruchejbreni.

¹⁵ Colgusaan guinibee Dad Jesucrist neñ lastootu, gususin te gudzu'tu diidx loj reni rniabdiidx lojtu xhicuent runlojtu guibi' Jesucrist. Guideb yälñadolajz saru gudzu'tu diidx.

¹⁶ Colguibañsa'c te cuedxi xcälriejntu te che guiniyarenjreni la'tu sa'csi nabañsa'ctu loj Crist, jianxtujy reni rniyaj la'tu.

¹⁷ Sa'csi hueenru tedtu trabajw che cayuntu te dzunsa'c, palga si'c rlajz Dios, lacuaa tedtu trabajw sa'csi cayujntu dojl.

¹⁸ Sa'csi sigajcza tejtis gujt Jesucrist xcuent rextojñnu. Xhetliidi xtojñni guyu' nez loj Dios, niluxh gudejdni trabajwduxh xcuent rebendojl. Bejnñi si'c te gac guibignu lo Dios sa'csi gujt tiejxh Jesucrist, luxh guyusac sprit xtenni lo tiejxhni te gubañsacni.

¹⁹ Che gajd xpřitni guibisac lo tiejxhni, huij spritni basule'ni diidx loj resprit ni yu' latzguiib.

²⁰ Respritga najc renani di nusoob xtidx Noé che basule'ni xtidx Dios lojreni. Guläjz Dios rebejnga guiraa redxej ni cayujn Noé barcwro agujc xchero. Baslaa Dios xcälñabajñ xhujntis bejn, xhet gujcdireni gudejdreni lo nisguiro ni biajb guideb guedxliujre.

21 Che robnisnu naj, rusnaalajznu rebejn̄ga; yälrobnisga ruluiloj xho ruslaa Diosnu lo dojl̄. Et sa'csi riäjt beed lo tiejxhnu neñ nisga, alga sa'csi dxejc rniabnu lo Dios guniidxni te xcäriensa'c, sa'csi sajc xca'nuni xcuent ni gubañsac Jesucrist lo rebengut.

22 Che birii Jesucrist loj rebengut, biu'ni xhaguibaa cadro gurejni xladbee Dios te ro'c rnibeeni loj rexangl Dios, näjza loj guiraa respit ni rajc rnibee, ni yu' lo guedxliuj näjza xhaguibaa.

4

Colyejn xtzuun Dios

1 Ni'cni sa'csi agudejd Jesucrist trabajw cuajni lo cruzj xcuentnu, sigajcza la'tu riäj̄l guntu xhigab sidejdtu trabajw lo guedxliujre sa'csi nani agudejd trabajw, diruni gun dojl̄,

2 te guideb nabajñni lo guedxliuj, guibajñni si'c rlajz Dios, diruni guibajñ te gunni redzunguijdx xten guedxliujre.

3 Sa'csi bejntu si'ctis ni rlajztu galoo, bejntu si'c rujn rebejn̄ ni di gumbee Dios, bejntu si'cni rlajz tiejxhtu, bejntu latsiaj, gusojztu, bejntu relaniro, gudedcaj gusojztu, luxh bejntu cosxtu-iduxh bazuxhijbzatu loj rebanäb̄dxab.

4 Dxejcti rebejn̄ ni rujn recosga naj, rdxeløjreni sa'csi dirutu gun ni rlajzreni, ni'c rniyajreni la'tu.

5 Niluxh laareni suureni nez loj Jesucrist ni agojl̄ gun yäl̄guxhtis loj guiraa rebejn̄, rebejn̄ ni nabajñ näjza renani agujt, te gusule'reni xcuent nani bejn̄reni.

6 Ni'cni basule' Jesucrist xtidx Dios loj reni agujt, te mase che gubajñreni lo guedxliuj gujcreni yälguxhtis si'ctis ni rajc bejn, dxejc gujtreni, ñaj sprit xtenreni sinuu guibajñ si'c ni rlazj Dios.

7 Asiäddzungajxh dxej che guibisac Jesucrist lo guedxliujre. Ni'cni ganax laaca colyejn xhigab, colgusiñ xcäriejntu te saru cuedx-guiniabtu lo Dios.

8 Niluxh ni maazru sajc najc yälsanälajz resa'tu sa'csi che rinälajztu resa'tu, riallajztu xtojł sa'tu.

9 Saru gurenäj bejn ni rdzujñ rolijzlu, na'c jiejytu.

10 Abaniidx Dios loj tejgatu te dzuun ni sajc guntu. Dzuunga colyacnäjä resa'tu, te si'c guluiitu lo resa'tu laaca cayunsa'ctu guira'ti nani baniidx Dios lojtu.

11 Palga tejtü najc xtzuunni guluiini xtidx Dios, suguiniini ascanu najcni xtiidxpac Dios. Palga tejtü najc xtzuunni gacnäjäni sa'ni, sugunnini, guideb yälñadip yälñadaan ni rudeed Dios lojni, te guira'tis ni rajc sujn guiliä'p xpala'n Dios xcuent Jesucrist. Sa'csi laatisni riäjł chä'p xpala'nni, laatisni riäjł guinibeeni tejpas. Sugacni si'c.

Xho nanab tednu trabajw

12 Rebetzä ni sanälazä, na'c guidxelojtu sa'csi cadejdtu trabajw ni najc si'c guiboo, ni siäd te gactu preeb. Na'c guntu xhigab xhichani'c casiajctu.

13 Colguibalajz sa'csi sigajc ni cadejdtu trabajw sa'ni gudejd Jesucrist, sigajcza sibalajztu che guiluiloj xcälrdimbicha' Jesucrist.

14 Palga rniyajreni la'tu sa'csi rililajztu xtidx Jesucrist, chicbaa la'tu, sa'csi rbäjz Xpřit Dxan xten Dios guideb xcälrdimbicha'ni neñ lastootu.

15 Gunatiro, andi gusaantu ted tejtıu trabajw sa'csi bagu'ttu bejn, o sa'csi gulajntu xhi xten bejn, o sa'csi bejntu latsiaj, o sa'csi huichu'ni lo xcuent sa'ni ni xhet nungäjldi gacbeeni.

16 Palga yu' chu tej tedni trabajw sa'csi rililajzni xtidx Jesucrist, na'c guitujyni, alga suguiliä'pni xpala'n Dios xcuent Jesucrist.

17 Abidzujñ dxej che ganid rexpejn Dios ted trabajw. Luxh palga ganid nuurnu gacnu yälguxhtis luxh ahuililaaznu xtiidxni, jxhocha gun rebejn nani di chalilajz xtidx Dios xcuent Jesucrist!

18 Lo xtidx Dios caj scree:

Lacti naganlajz rliaa rebenñaya lo dojl,
 ¿xhocha gunäjni rebejn nani di chalilajz xtidx Dios
 näjza rebenđojl?

19 Ni'cni, guiraatu nani cadejd trabajw xcuent xtidx Dios si'cni rlajz Dios, colgudeed xprıttu lo Dios ni di gusguee, ni bencheetu, te chanuutis guntu ni riäjlguntu.

5

Yälrulıjdx loj renani ahuililajz xtidx Dios

1 Narä nacä te beñgool, bahuiä trabajw ni gudejd Jesucrist, bahuiäza xcälrdimbicha' Jesucrist ni gunıidxni loonu che guıbisacni lo guedxliujre. Ni'cni rulıdxä la'tu ni najc rebenñgool,

2 colgajp renani rililajz xtidx Dios nani rajptu fııpactıu xhi rujnreni. Colga'preni si'c te bejn ni rajp xiil, colıejynni guideb yejc, guideb lajztu. Colıejn

si'c sa'csi si'c rlanj Dios guntu, na'c gunlojtu meel. Colguibalajz cayajptu rexpejn Dios.

³ Na'c guinibeetu lojreni si'c rnibee te lam loj reni rujn xtzuunni, colguluiireni xho gunreni con xcäl'nabansa'clu.

⁴ Che guibisac Jesucrist, ni rajp nuure, laani suniidxni xcuentnu, te yäl'nasacduxh nani dipac nitloj.

⁵ Sigajcza la'tu ni najc bi'n, colgusobdiajg xtidx rebeᅅgool. Guiraatu coljju xtidx sa'tu, colguluii sa'tu guideb nadolajz. Sa'csi:

Dios rbälaz rebejn ni runnaro lagajc laareni, niluxh racnäjni rebejn ni najc nadolajz.

⁶ Ni'cni guideb yäl'nadolajz coljju lo Dios sa'csi rajpni yäl'rnibeduxh, te guiliä'pni xpala'ntu che gal dxej ni guibisacni.

⁷ Colgudeed guiraa reyärsia' ni yu' lastootu lo Jesucrist te guscuecdxini xcäriejntu sa'csi laani sanälajzni la'tu.

⁸ Colgusanij xcäriejntu, colsusin sa'csi rdxe'ch bendxab lojtu, cansaxhiga'tzni si'c te beedz nialajz, caguiilni chu guxinni.

⁹ Colsudzu'tz nez lojni, guideb lastootu colchalilajz xtidx Dios, sa'csi anajntu sigajcza cayunnäjni guiraa rebetzn ni nabajn lo guedxliujre.

¹⁰ Che agudejdtu trabajw tiop-choᅅ dxej, Dios nani rajp guiraa yäl'racnäj, nani gurejdx la'tu te näjza la'tu xca'tu xcalrdimbicha'ni xcuent lagajc Jesucrist, lagajc laani sunsa'cni la'tu, bejn ni rsiudzu'tz lo xtiidxni, bejn ni nadip lajzni, bejn ni di guidxejb.

¹¹ Laani rajpni yäl'rnibeduxh par tejpas, guiliä'pnu xpala'nni par tejpas. Sugacni si'c.

¹² Siädnä Silvan guijtze lojtu. Runä xhigab najcni te bejn nani huililazsa'c xtidx Dios. Abacuaä bale'si diidxre lojtu te gulidxä la'tu, te guiniliä lojtu dee najc xcälracnäjpac Dios. Col̄sudzu'tz xcuent yälracnäjre.

¹³ Rexpejn Dios ni re' lo guedx Babilonia ruxhal̄ xtixtios lojtu sa'csi gule Dios la'tu sigajc guleni laareni. Marcw, ni najc si'c xi'nä, ruxhal̄za xtixtios lojtu.

¹⁴ Col̄guinii “xchan” lo tejga sa'tu ro'c.

Rniabä lo Dios guscuecdxini lastoo guiraatu ni rililajz xtidx Crist.

Xtidxcoob Dios ni biädinä dad Jesucrist
New Testament in Zapotec, Mitla (MX:zaw:Zapotec,
Mitla)

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

5cff1274-8dc3-5398-a94d-f6033bb363c9